

# Rumah terbuka biar sederhana

## Tuan rumah, tetamu perlu elak pembaziran makanan

Oleh Mohd Shahrizal Nasir

Satu tradisi dalam masyarakat Islam di Malaysia pada Syawal ialah mengadakan majlis jamuan sempena Aidilfitri. Ia antara lain bagi melahirkan rasa kesyukuran dan merapatkan hubungan silaturahmi.

Menjamu tetamu dengan makanan terbaik adalah amalan rasul. Hal ini seperti dijelaskan Allah SWT dalam al-Quran ketika menceritakan perihwal Nabi Ibrahim yang memuliakan tetamu bertandang ke rumahnya.

Firman-Nya bermaksud: "Sudahkah sampai kepadamu (wahai Muhammad) perihwal tetamu Ibrahim yang dimuliakan?"

"Ketika mereka masuk mendapatkannya, lalu memberi salam dengan berkata: 'Salam sejahtera kepadamu!' Ibrahim menjawab: 'Salam sejahtera kepada kamu!' (Sambil berkata dalam hati): Mereka ini orang yang tidak dikenali."

"Kemudian dia masuk mendapatkan ahli rumahnya serta dibawanya keluar seekor anak lembu gemuk (yang dipanggang). Lalu dihidangkannya kepada mereka sambil berkata: 'Silakanlah makan.'" (Surah adz-Dzariyat, ayat 24 hingga 27)

Penganjuran majlis rumah terbuka seperti diamalkan kita memberi peluang kepada umat Islam untuk mempamerkan keindahan Islam yang menggalakkan setiap umatnya menjalinkan

hubungan baik sesama manusia.

Islam juga tidak pernah melarang kita menjemput masyarakat bukan Muslim untuk hadir ke majlis dan menjalinkan hubungan baik dengan mereka.

Firman-Nya bermaksud: "Allah tidak melarang kamu daripada berbuat baik dan berlaku adil kepada orang yang tidak memerangi kamu kerana agama (kamu) dan tidak mengeluarkan kamu dari kampung halaman kamu. Sesungguhnya Allah mengasihani orang yang berlaku adil." (Surah al-Mumtahanah, ayat 8)

Namun, sewaktu mengadakan majlis jamuan sempena hari raya ini, kita wajib menjauhkan diri daripada perkara dilarang Allah seperti mengadakan majlis dengan tujuan bermegah-megah, berlebih-lebihan, bersifat boros dan membazir.

Firman-Nya bermaksud: "Dan berikanlah kepada kerabatmu dan orang miskin serta orang musafir akan haknya masing-masing dan janganlah kamu membelanjakan hartamu dengan boros dan melampau-lampau."

"Sesungguhnya orang

yang boros itu adalah saudara syaitan, sedangkan syaitan itu pula adalah makhluk yang sangat kufur kepada Tuhannya." (Surah al-Isra, ayat 26 dan 27)

Sebaik-baik cara adalah bersederhana sebagai mana diterangkan pada surah al-Furqan, ayat 67 bermaksud:

"Dan juga mereka (yang diredai Allah itu ialah) yang apabila membelanjakan hartanya, tiadalah melampaui batas dan tiada bakhil kedekut dan (sebaliknya) perbelanjaan mereka adalah betul sederhana di antara kedua-dua cara (bo-

ros dan bakhil) itu."

Kita sebagai tetamu juga perlu mengelakkan pembaziran. Ambillah makanan secara berpada-pada supaya ia dapat dihabiskan dan mengelakkan pembaziran. Janganlah makanan diambil banyak itu tidak dapat dihabiskan dan dibuang begitu saja.

Firman-Nya bermaksud: "Wahai anak Adam! Pakailah pakaian kamu yang indah berhias pada tiap-tiap kali kamu ke tempat ibadat (atau mengerjakan solat) dan makanlah serta minumlah dan jangan pula kamu melampau, sesungguhnya Allah tidak suka orang yang melampau batas." (Surah al-A'raf, ayat 31)

Marilah kita sama-sama mengawal nafsu agar tidak

terjebak dalam pembaziran. Bagi tuan rumah, rancanglah penyediaan makanan sebaik-baiknya agar ia tidak terbuang.

Bagi tetamu pula, nikmatilah makanan yang dihidangkan itu dengan sopan dan tertib. Usah gelojoh ketika mengambil makanan sehingga akhirnya ia terpaksa dimasukkan ke dalam tong sampah.

Lebih penting, sewaktu menghadiri jamuan makan sempena hari raya, kita tidak lupa mendoakan kesejahteraan tuan rumah dan tetamu lain.

Mudah-mudahan setiap daripada kita mendapat rahmat dan keberkatan hidup daripada-Nya.

Penulis penyarah UniSZA



RUMAH terbuka dapat mengeratkan silaturahmi.